

Hunta di Supervishon di
Stichting Vidanova Pensioenfonds
Aquariusweg 2-4
Curaçao

Kòrsou, 17 di yùni 2020

Apresiabel Direktiva,

Mi nòmber ta Errold Bishop, mi ta un èks empleado, lider sindikal i penshonado di e kompania di utilidat Aqualectra. Pa medio di e karta aki mi ta aserká bo en konekshon ku lo siguiente;

Manera mi ta asumí ta konosí serka bosnan ku Korte den Promé Instansia di Kòrsou a terminá e bankarota di e kompania Blue Factor B.V., den su veredikto di 22 di òktober 2019.

Blue Factor B.V. manera bosnan sa, ta un kompania ku a pertenesé na e konsorsio di kompania manera entre otro, Blue Liaison Holding N.V., Blue Liaison Financial Group N.V., Blue Liaison Corporate Finance N.V., Blue Liaison Finance B.V., Blue Liaison Real Estate B.V., Blue Factor (Aruba) N.V. i Blue Factor (St. Maarten) B.V. tur ta forma parti di e konsorsio aki.

Na momentu ku Blue Factor B.V., a bati bankarota e kompania aki tabatin un debe di ANG 10.025.352 na Stichting Vidanova Pensioenfonds (Vidanova).

Tin tur indikashon ku Vidanova a fia Blue Factor B.V. e suma aki for di fondonan di Vidanova ku ta destiná pa paga primanan di penshun di e penshonadonan di e kompanianan di utilidat. Manera bo sa, e trahadónan aki ta kontribuí na e fondonan pa Vidanova por paga e penshun di e empleadonan aki ora ku nan yega nan edat di penshun, manera ta e kaso ku mi persona.

Ta p'esei ta sumamente remarkabel i kuestionabel ku Vidanova no a pèrkurá pa suficiente seguridat di biennan adekuá, pa garantisá ku Vidanova lo por rekobrá e sumanan ku a ser fia na Blue Factor B.V.. Esaki pa medio di "colleteral" manera propiedatnan di Blue Factor B.V. komo garantia pa e fianza aki. Manera bosnan dor di e bankarota di Blue Factor B.V., e último aki miéntas tantu, a materialisá su mes.

Tin tur indikashon ku e fayó aki di Vidanova a kondusí na pèrdida di fondonan mionario di depositantenan. Esta e fondonan ku ta destiná pa nos, esta e penshonadonan. Meskos tin indikashon ku Blue Factor B.V. no a utilisá e fondonan aki pa e meta pa kua Vidanova a fia Blue Factor B.V. e suma mionario aki, i tin tur indikashon ku un parti hopi grandi di e fondonan aki a disparsé den saku di personanan (huridiko), pa ken e fondonan aki no tabata destiná. Komo konsekuensia Vidanova no por rekobrá ningun parti di esaki di Blue Factor B.V., ku, den kuadro di su bankarota, a keda plan barí.

Sin mas por konklui ku gerensia di Vidanova a manchá e fondonan di un forma responsabel, pero esaki a tuma lugá di forma kompletamente deskabeyá i inakseptabel. No ta akseptabel ku Vidanova, ku konosé tantu un direktiva komo un hunta di supervishon ku ta konsisti di profeshonalnan riba tereno finansiero, por a fia Blue Factor B.V. mas ku 10 mion florin sin pèrkurá pa Vidanova tin suficiente garantia adekuá pa garantisá ku Vidanova por rekobrá e fondonan ku el a fia Blue Factor B.V. bek.

Na mi opinion, ta konfirmá ku tabatin mal maneho di parti di gerensia di Vidanova den e kuadro aki i gustosamente mi ke tende di hunta di supervishon di Vidanova ki pasonan Vidanova a tuma kaba i/òf ta kontemplá di tuma pa koregi esaki i rekobrá e fondonan ku a bai pèrdí te ku awor. Tambe mi ke tende si Vidanova, durante e bankarota di Blue Factor B.V., tabatin kontakto ku e kurator pa determiná si den Blue Factor B.V. tabatin mal maneho i si via di e kurator aki, Vidanova por a presentá un demanda pa dañonan kousá dor di e mal maneho di Blue Factor B.V..

E kaso aki ta hopi serio, sigur konsiderando ku aparentemente Blue Factor B.V. a dal PSB Bank tambe un 'paluska' formal di miónes.

E seguridatnan, ku Blue Factor B.V. a ofresé pa por a fia miónes for Vidanova a resultá di ta "gatu den saku". A pone komo garantia un pakete di "vordering" di Blue Factor B.V. riba debedónan, di ken na momentu ku Blue Factor B.V. a empená esakinan na Vidanova, ya tabata konosí ku nan no tabata kapas pa kumpli òf di tur manera ya no tabata kumpli ku nan obligashonnan i di ken no por a spera tampoko ku nan lo por òf lo a bai kumpli ku nan obligashonnan.

Konsekuensia di esaki ta ku awor no tin forma, sigur no fásil pa rekobrá e fondonan di esnan ku ta responsabel pa e debakel ku Blue Factor B.V..

Den e kuadro aki mi a komprondé ku tin indikashonnan serio tambe ku Blue Factor B.V. a pasa e fondonan di e penshonadonan en kuestion pa un òf mas di su kompanianan ruman i/òf ligá. Esaki den forma di fianza i, posiblemente, tambe pa nan por atkeri biennan inmóbil bou di nan nòmber òf bou di nòmber di otro kompania òf persona aparentemente, pa despues laga Blue Factor B.V. bai muri den bankarota.

Ku konsekuensia ku a hit nos fondo pa mas di 10 mion florin. "Hit" pasobra a pèrkurá pa no por rekobrá nada dor ku a krea i usa diferente struktura involukrando diferente kompania di otro pais pa por hasi kobransa ainda mas difisil, si no imposibel.

Di forma responsabel nos mester puntra nos mes ta kon por tabata posibel pa e kompania Blue Factor B.V., aki ku na desèmber 2009 a sera un fasilidat di krédito ku Vidanova, kual a ser firmá pa Randolph Camelia i Harry Parisius komo miembro di su gerensia, por a sigui fia Blue Factor B.V. nos fondonan, miéntras ya e debenan a subi bai den miónes, sin ku niun hende a intervení i para e fiesta aki.

Ta hopi pregunta tin, riba kual mi ke un kontesta di hunta di supervishon di Vidanova;

1. Ken ta bai para responsabel pa e fiasko aki?
2. Ken ta esnan den Vidanova, ku ta responsabel pa e debakel aki?
3. Ta asina aki nos a pèrdè nos sèn?
4. Por rekobrá e fondonan for di esnan ku ta responsabel pa e debakel di Blue Factor B.V.?
5. A tuma e pasonan rekerí pa determiná esaki i, si e kontesta ta afirmativo, kiko Vidanova a hasi kaba i lo mester hasi ainda den e kuadro aki?
6. Vidanova a komuniká den pasado ku e kurator di Blue Factor B.V. pa wak kiko por a logra via e kurator?
7. Por konfirmá ku tin persona serio i solvabel ku a keda ku debe na Blue Factor B.V.?
8. A hasi esfuerso pa logra kobransa di esakinan via di e kurator?
9. Kiko a sosodé ku e demandanan aki di Blue Liaison?
10. Asina leu ku esakinan no tabata empeñá kaba na Vidanova, a trata di haña traspaso di e demandanan di Blue Factor B.V. aki pa Vidanova, di moda ku Vidanova lo por a kobra esakinan?
11. Loke Blue Factor B.V. a empeñá na Vidanova ta trata di e mesun empeñonan ku Blue Factor N.V. a duna PSB Bank?
12. A usa nos fondonan den Vidanova pa laga Blue Factor B.V. i/òf kompanianan ligá na Blue Factor B.V. utilisá esakinan pa kumpra propiedat no móbil?
13. Si ta afirmativo, ken e personanan aki ta?
14. Tin informashon pakiko e bankarota di Blue Factor B.V. a yega su fin?
15. Kiko Vidanova a hasi pa realisá e sugerensia di e kurator pa por ehèmpel Vidanova, finansiá su trabounan pa persigui esnan responsabel pa e mal maneho di Blue Factor B.V. i e dañonan ku esaki a kousa pa Vidanova i nos komo penshonadonan partisipante?
16. Dikon no a tuma akshonnan den e tempu definí pa evitá esaki?
17. Si esaki ta negativo, pakiko Vidanova a hasi esaki?
18. Ta korekto ku tin òf tabatin representantenan di kompanianan di utilidat, ku mester a wak nos interesnan, den hunta di supervishon di Vidanova manera a sali publiká den prensa?
19. Ta korekto ku niun di nan a intervení?
20. Si e kontesta ta afirmativo, ta ken e komisarionan aki ta òf tabata?
21. Si ta asina, esnan den maneho i òf esnan den hunta di supervishon di e entidat(nan) responsabel i enbolbí den e chanchuya aki, por splika nos ken su interes tabata den wega i ta ken su interesnan nan a protehá i defendé?
22. Ta kon algu asina por a sosodé?
23. Ta responsabel pa nos mantené nos fondonan di penshun den Vidanova i bou di maneho di Vidanova?
24. Esaki ta e úniko kaso di mal maneho kaminda nos sèn a pèrdè òf tin mas di e kasonan serio aki?
25. Si no por haña e sèn bek, ken ta responsabel bosnan di direktiva personalmente?


Tumando e situashon deskribí na konsiderashon, mi ta partisipá ku si mi no haña un kontesta satisfaktorio riba tur mi preguntanan menshoná por eskrito, den dies dia despues di e karta aki, mi lo aserká tantu e sindikatonan di Aqualectra ku ta risibí un kopia di e karta aki, komo e penshonadonan di Aqualectra i otronan ku lo por sirbi nos interes di penshonado, pa buska pa sa kon por rekobrá nos sènnan pa kua nos a traha hopi duru i ku a somentá di forma dudoso den Vidanova.

Nos sènnan, pa kua nos a traha hopi duru, no por disparsé den saku di otronan, sin ku ta bin un investigashon kompleto i un splikashon konkreto i akseptabel òf sin ku niun hende ta para responsabel pa esaki.

P'esei mi ta avertí ku si mi mester tuma pasonan konkreto pa sa e bèrdat òf pa eksponé esnan, ku segun ami ta responsabel mi lo hasi esei tambe debí ku aki nos no ta papia di un depchi, pero di miónes pa kua ami i mi koleganan a traha hopi duru durante kasi henter mi bida ku e meta pa mi lo por tin mi penshun i por disfrutá di esaki.

Pa awor aki tur lokual mi ta pidi komo promé paso ta un akklarashon, di kiko a pasa eksaktamente ku e fondonan di depositantenan i kiko ta bai para di e mas di 10 mion florin ku Vidanova a fia Blue Factor B.V., den e término menshoná.

Atentamente,


17/6/2020
Errold Bishop
Dr. Jonckheerstraat 26
Tel. 5929 515 3521

Kk: Gerensia di Vidanova
Gerensia di Aqualectra N.V.
Sindikatonan SEU, STKO i STK
Banko Sentral di Kòrsou i Sint Maarten